

蘇文忠公詩編註集成
(一)

——附篇名索引

臺灣學
生書局印行

蘇

生

書

PDG

嘉慶二十四年鐫

蘇文忠公詩
編註集成

武林韻山堂

版

蘇文忠公詩編註集成總目

計開

各序

自序

凡例

諸家弁言一卷

王施註諸家姓氏考一卷

像贊

勅序贊

墓誌銘註一卷

本傳註一卷

考錄

聖祖仁皇帝

高宗純皇帝御評一卷

詩目一卷

編年總案四十五卷

編年古今體詩四十五卷

帖子口號詞一卷 眞像考

兩宋雜綴一卷

蘇海識餘四卷

牋詩圖一卷

附錄：篇名索引

序

予從韓桂舫大司寇獲識仁和王君見大於嶺南王君學識淹通深於史所撰蘇文忠公詩編註集成尤精博匪特聚百家爲大成更可訂元修宋史之舛陋予於接席間歷扣王君致力於蘇詩之處王君曰蘇詩編年註不始於施德初與顧禧也當元豐間坡公遷黃彭城陳師仲爲編述密徐二郡所作古律以寄事載東坡集中今王龜齡集註姓氏錄彭城陳師道後載有陳希仲以其註內劉共父或稱洪父張敬夫亦稱欽夫例之是希仲註卽師仲也其後坡公北歸有前後集編年註則趙次公宋援李德載程縯四家也李敬齋載在古今藪謂之四註本繼有林子仁者復附益之改四註爲五註考子仁於政和中賜號高隱處士而自政和上溯建中靖國僅一十七載註已兩刊德洪親見黃魯直而謂坡公海外詩中朝士大夫編集已盡可爲崇觀時刊行四註五註之證是編

年註出於北宋者也次公同時有趙夔者嘗知榮州納交於叔黨別創爲分類
註垂三十年而刊於紹興之初自鳴一家復有師民瞻任居實孫倬李堯祖四
家接踵於後其爲體例一本於夔而取編年五註並納入之是爲八註十註庚
溪詩話載乾道初梁叔子入對阜陵謂近有趙夔等註軾詩甚詳而龜齡集註
序則云舊得八註十註考夔序其詩分五十類自爲單行與編年五註各不相
牟乃判定後閱三十五年而阜陵自爲趙夔等註此卽夔註五註並入八註十
註之證夔序仍以分類弁首故云趙夔等也龜齡集註實由八註十註推廣今
編年五註猶有存者檢對龜齡集註其入選者十有六七亦惟此十家註獨賅
備與龜齡增輯諸家繁簡縣殊此是十家分合具可考也龜齡在隆興朝力持
國是阜陵方倚爲用其不及集註者龜齡亦僅有此八註十註而已殆至乾道
已知諸將不足用歷典四郡自効專以及民爲務而其排纂亦在此時以阜陵

不及集註考之是書成後六年矣呂伯恭廣藝註爲七十八類龜齡實主呂本
故集註亦七十八類載入姓氏錄伯恭名下而藝之分類亡今其序猶存而與
集註分類不符由於此也龜齡序又云自八註而十自十註而百均之百人此
又八註十註積累至百之證計其所均之人列門牆預後進者爲黃魯直陳無
已秦少儀潘邠老王直方劉無言曾公衮晁冲之韓子蒼李商老潘仲達蘇養
直釋祖可出魯直西江派者爲謝無逸洪朋高子勉楊信祖夏均父何人表洪
芻饒德操李希聲謝幼槃徐師川洪炎汪信民釋信中流入播遷號耆舊者爲
王性之汪彥章林敏中呂居仁王長源江端本元不伐林子來通計北宋註可
知者四十七家南渡傳聞學者爲劉子翬黃通老陳體仁汪聖錫龔實之胡邦
衡劉共父張南軒呂伯恭甄雲卿登朝籍及閒放者爲張孝祥汪養源吳明可
馮圓仲芮國器胡元任鹿伯可陳少章王壽朋葉飛卿丁鎮叔孫彥忠項用中

葉思文喻叔奇王百朋張器先傳薦可通計南宋註可知者三十一家此編年累改爲分類滙爲集註之大畧也施德初登張孝祥榜龜齡出五載始入爲著作佐郎其與顧禧爲編年註應在淳紹之時據陸游原序概論作詩事實而下云德初絕識博學係指題下施註紀事又謂助以顧禧該洽係指句下顧註徵典紀事引本集樂城史傳不載出處徵典引經史子集外藏悉載出處顯屬二手卷端施氏顧氏以次標列亦可與序參證卷中疵議趙夔程續等註輒曰舊註而於次公閒一標名其編年謹於五註亦見施顧所因又凡原引經史正義已盡則避去佐以別載此緣施顧不時緝檢五註十註是以相爲表裏所在符合其體段概可知矣施宿爲餘姚令乞序於游至嘉定付刊已較集註後出三十五年凡刊五十五年至景定而曼漈鄭羽爲淮東倉汰其字大小七萬一千五百七十七計一百七十九版自此流入元明無復表見而集註有元刊者則

已增入劉須溪註須溪在宋爲國博終於元季書雖元刊內有補列數家當卽須溪所爲其去宋刊固不遠也

國朝康熙間宋牧仲得施顧殘本邵子湘取肆本分類補綴因以編年爲施註而目肆本分類爲王註沿說至今肆本省七十八類爲三十類在前明已有之而不詳所自或言此出吳興茅本而新安朱本復省爲二十九類然迥非龜齡集註之面目此後查夏重得影鈔施殘本翁君覃溪得牧仲施刊本馮君星實兼得宋刊編年五註後集及元刊龜齡集註夏重補施星實王施並補參覈得失皆能赴其力之所至然於各註遞爲乘除而貫串一氣卒無有言其義者此編年註出於南宋近又兼并分類之大畧也予復讀王君之書知其涉歷諸家精校博考然後能集諸家之成而發其所未及王君蓋謂變法改法之不明則由於史陋朔黨洛黨之不辨則由於史諱紀時紀事之不當則由於註誣改編

補編之不確則由於註淆此皆於兩公本事未嫻貫於心而徒馳驚於外故其
政舛脫闕治之愈焚爰創立總案以統各詩復訂正誌傳以統各案而補所不
備於蘇海識餘中於是擊空踐實而裁爲具體意向畢達其前之以王補施也
先因肆本轆轤莫測誰某論者無徵五註集註出馮君星實猶以南渡後爭尙
蘇學賤解人衆爲言蓋相沿王註悉出南宋之舊說耳王君乃嚴趙呂之類別
窮施顧之編年上追豐祐下達貞元發明北註南註先後變易成於風會且其
旁搜遠紹氣類源流通感分合本末明晰泰然大同是皆確有所據足補前註
之未達矣坡公立朝犯難語言文字志節不磨得王君發之始無所遺誠括衆
美而舉其全矣予適觀是書之成復問而知其心得之要著於簡端俾海內讀
是書者由是而擴蘇公詩之義洵盛事也

道光三年癸未春二月既望督學使者揚州阮元敘

序

蘇文忠公以文章經濟爲有宋冠冕觀其學術之富德業之盛忠義氣之奮發雖跨唐越漢賈陸不足多也公起自西蜀適當熙寧紹聖之會邪說暴行薰灼天下始則上書攻法託爲諷諫構怨羣小至於放廢逮元祐更化廷臣皆以變法干進公獨以謂改革利弊不一未足推明先志消弭後憂輒與在廷爭議或開陳講筵之上憂危家國每飯不忘草制攄疏必達此意由是忤權坐訕屢召屢出然猶隨地効忠舉凡籌邊弭盜備裁放欠治河清漕諸事鮮不講求規畫以期有補於國旣遷嶺海坐不貼席而目覩兵燹民億政不卹下尙時時以澤民爲念終其身志弗少懈故跡其所爲詩或取觀於興象或寓諷於聯吟詞雖達而旨則隱文或華而體實質雖天才浩瀚而津涘莫測未可謂言語妙天下遽以譚諧嘯傲視之也公全盛時黃山谷陳無已潘邠老蘇養直韓子蒼諸門

人子弟於詩已有撰述其後趙堯卿次公李德載程季長諸人踵起遂有四註五註八註十註之作而張南軒安國呂伯恭胡邦衡之流皆有論著至王龜齡類聚一冊蓋已幾及百家矣百家註失次則施顧註編之施顧註殘佚則查註補之馮註合百家參之然以詩而求當乎註或繁徵而義晦或異趨而事贅條目雖張而指歸不一學者疑之十尚三二信有待乎方來也仁和王君見大學識天成泛濫羣籍在年少時以其詩文鳴於大江南北亦旣哀然成集自名一家矣顧其立意不尙空言取諸實用故於公文獨有神契而因以發明其詩此其刪述之志所由興也殆後游觀吳楚至於嶺海會朱文正公持節開府引君爲上客謂君必名世君詩上追正始宜於述作載入知足齋集君用是益信而士大夫之求交於君者戶爲之滿繫維永夕轉瞬經年因葺韻山堂以居儲書其中日事冥討雖問奇載酒車騎踵接而君於譚笑間心撫手追用意未嘗不

在其或行役於外南窮海角北抵中山輒挾一編自隨收江山之助發而公仕跡躋蹤題詩所到之處君皆縱觀有得誦詩以見志焉故其書標案爲經而以詩爲緯互相援證不可偏廢自公始生以及登朝凡二十六年本集不足於用則補以嘉祐集出判營兆京推發策十年則主詩文紀錄杭密徐湖八年則詩文參以書奏元祐敷歷中外九年則以內外制劄狀爲正獨黃惠僖遷徙最久先後歸常皆飄泊塗路間統計一十三年文無綱領羣碎散曼難於掇拾君或一至再至訪尋遺躅參稽往籍甚至郵筒續軸咨訊往復必求其與集鍼芥適合而止蓋非是則立案不足昭信而詩無由定編其致力也可謂勤且遠矣嘉慶丙寅猶子寶繩宰博羅歸攜出蜀鳳翔直館杭密徐湖各卷爲道君意徵序於予予謂出蜀之創始鳳翔之雪誣直館之舉綱杭之正舊編密之補政事徐之考行跡湖之詳詩勘皆得史遷筆明年爲手書韻山堂額寄君而序未敢遽

作蓋有待也其後

寶繩

遷鎮遠守繼又典桂林六七年中數與君相見君頗經

營悅悴而是書以成會予年躋九袞

寶繩

假歸出其全藁示予予謂觀三黨而

知君淹貫春秋傳觀三出而知君意本諸魯論觀三遷則又驅莊列御風而行

舉此三難而浙潁淮河之事功並見合前幅而無美弗備重離繼照輝映千古

循孔孟之正軌續韓歐之一鐙蘇學大明毫無遺憾學者熟此而養氣立節致

君澤民之道已盡若夫詩之得失損益且不待君言而灼然共觀思已過半書

曰惟木從繩則正是卽經與緯之度也竄其然乎往者君臯亭紀游集成顧涑

園先生爲製序且謂予君他日當不凡予亦言題下諸小序考論扼要自是巨

手因手題一籤署名其上此乾隆戊申事也今涑園久歸道山而予以臃腫一

老沐

堯醲舜薰之化熙熙皞皞縣延於世者又二十六載得見君述作之大成然後

知涑園之所以處君者固自有在而予之獲序是書并次所聞於寶繩者用以復於君其亦庶幾明君之意也夫是爲序時嘉慶十有八年龍集癸酉仲春月旣望

賜進士出身

誥授奉直大夫 日講起居注官翰林院侍講嘉慶丁卯科重宴鹿鳴

特恩加翰林院侍講學士銜年世姻家弟錢塘梁同書頓首拜譔時年九十有

序

吾嘗博觀典籍而竊歎夫文章之道有三難焉作者難讀者難而註者尤難卽以詩而論人生而靜有感則鳴康衢擊壤喜起麇揚尚已三百篇以降流爲漢魏六朝盛於三唐延及兩宋自名公鉅卿以及勞人思婦孽子孤臣當其原本性情各抒胸臆託詞寓諷或泣或歌初不顧後人之讀與不讀又何暇計其註與不註哉然而性情幾微不得其中詞章絲毫不軌於正皆難免於後世之指摘故唐棣言思見刪尼父香奩體豔絕口醇儒此非作者之難乎至於前人往矣後人生於數百千年以下取數百千年以上之詩伏而誦之若非脫去形骸獨以神運以古人之心爲心以古人之境爲境設身處地情性融洽則我之精神命脈與古人之精神命脈隔礙不通又何能領略其中之甘苦讀書豈易事哉迨夫聲入心通神與古會復念天下至大來世正長我旣窺古人之堂奧又